

## TERRA MIA

Viu la natura crisciri  
e aspettu lu màgicu momentu  
chi la terra grapi  
li so' visciri  
pi ascutari l'ecu  
di lu so cantu.

Lu me cori  
letu, letu sentu.

Viva si', terra mia,  
trapàna nta la menti  
la to sinfunìa  
chi mi teni arruspigghiatu.

Nta la to peddi mi stricu  
e a qualsiasi ura  
cogghiu li to' frutti.

## LI PRIMI PIRRIATURA

A Custunaci pariànu castiddari  
chi dàvanu quasi 'mpacciu.  
Cu' lu putìa sapìri chi vurricatu  
c'era surgiva di pirlatu e di libicciu.

Mastru Antuninu Spada e Mastru Bastianu Bulgarella  
ficinu li primi sacrifici;  
di luntanu sintianu lu ciauru di lu marmu,  
cuminciaru a scavari cu li manu,  
poi arrivaru àutri pirriatura trapanisi  
e manovali di Palazzolu e di Casteddammari,  
Arcamisi e di tanti àutri paisi.

Tempu arresi era dura la pìrrera,  
lu pezzu s'avìa a scapulari,  
si preparava la cugnera, poi si dava di mazza  
e la petra si ciaccava.

A ddi tempi forza ci vulìa nta li vrazza,  
li pirtusa si facianu cu lu burinu e lu palu di cavari.  
Salati eranu li sudura e ni risintìa lu schinu  
e quannu la corda nta l'arganu si rumpìa  
si facià lu 'nchiummaturi cu la zaccurafa.

Veramenti assai si cummattìa!  
Lu pezzu s'avìa a squatrari  
sbuzzannu cu subbia e mazzetta,  
cu cricchi e palettu lu pezzu scugnava  
e a lu caricaturi s'avvicinava.

Nna sta mentri lu suli strazzava la peddi,  
azzintiavanu li ciaccaturi nta li manu  
e assullivàvanu puru li caddi.

Pòviri cristiani, a la sira  
scavigghiati l'avianu li spaddi  
e l'ugna di li manu smanciati!

Foru mastri, capaci e travagghiatura:  
accussì s'arruspigghiau Custunaci!



Foto donata da Spada Andrea

Maestro Antonino Spada

## CUSTUNACI

Paìsi arruccatu nta la cullina,  
si senti lu ciauru di lu marmu la matina.  
Custunaci, ricca di pirreri,  
la furtuna ti vasau li peri.  
Paìsi, t'arruspigghi tuttu 'ntulittatu,  
di lu megghiu marmu si' lucidatu.  
Su' marmi culurati e priziusi,  
paìsi di rocchi e di balati:  
ora ricchizzi e sordi a palati!  
Finiu lu tempu di li matarazzi di pagghia  
e d'arripizzari li robbi cu la ugghia:  
canciau la qualità di la vita:  
ora si dormi nta li linzola di sita!  
Nta li casi avemu li tisori  
e allegru batti lu nostru cori!

## CIRCA 2000 ANNI FA

Circa 2000 anni fa,  
lu Verbu  
nta lu ventri  
di la Madonna si 'ncarnau,  
e nascìu l'omu  
chiù 'mpurtanti di lu munnu!

Caminau supra sta terra  
e desi un sensu a l'umanità.

A la nostra esistenza  
ricchezza e sintimentu lassau  
e ancora, dopu 2000 anni,  
Signuri si' na surgenti antica,  
si' nta li nostri cori,  
pi sempri nta la nostra vita.

## BEDDA CUSTUNACIOTA

Bedda si' tu, Custunaciota,  
passii pi lu paìsi leta leta;  
cu ssi sguardi chi tu fai,  
cu ssa vucca chi tu hai  
e la facci a l'acqua e sapuni  
quannu ti viu mi veni la tentazioni.

Poi si ti sentu parlari  
sonna proibiti mi fai fari!  
Lu sangu mi quarìa nta li vini,  
sentu un focu, mi sbampa senza fini!  
Di lu paìsi si' la meravigghia,  
puru l'anzianu s'arruspigghia!

Bedda si' tu, Custunaciota,  
si mi dici s'è ti dugnu na vasata.  
Ti dassi centu appuntamenti,  
sfugassi lu me cori e la menti.  
Dammi un'ura prima chi lu suli mori,  
fallu, fallu cantari stu cori!

Li me' sentimenti sunnu sinceri,  
vulissi canùsciri li to pinseri!  
Si nun ti viu a tutti addummannu...  
passau passau, ma quannu?  
Li to' occhi sunnu gocci di mari,  
batti lu me cori comu nun poi capiri.

Bedda si' tu, Custunaciota,  
si' fimmina, mi rallegrì tutta la jurnata.  
Nta la menti assùmmanu frasi d'amuri,  
lu me cori diventa cantaturi.  
Tu si' la me musa, la me simpatìa,  
allegru cantu pi tia e scrivu puisìa!

## LA VITA È

La vita è  
un fruttu di milli sapura,  
è un brillanti cu tanti facci,  
è na vampa senza culura.

La vita è  
na rosa profumata cu li spini,  
di li nostri sudura abbivirata.

Ci sunnu li guai  
e li momenti felici,  
ma tu nun t'arrénniri mai!



## LU PRIMU CIURI

Crisci, vita,  
agghiutti vuccuna di matri,  
inchiti l'occhi di luna,  
di mari, di stiddi, di suli.

Crisci, vita,  
cu carizzi di ciatu  
a tutti li uri.  
Si' la luci di lu jornu,  
si' lu primu ciuri.

La notti cori di matri  
ascuta lu to sonnu.  
Cerca la strata giusta,  
sarà longu lu to camìnu!

Na stidda lucenti  
vigghia supra di tia.  
Lassa cantari la to ànima:  
c'è cu' la senti!



## FÌMMINA

Fìmmina,  
appena nasciuta  
rallegri tutta la casata.

Fìmmina  
picciridda, nuzzenti,  
miràculu di la natura,  
pi la matri si' luci di stidda.

Fìmmina signurina,  
si' un ciuri  
chi sbuccia ogni matina!

Fìmmina  
amanti, zita  
e puru granni amica!

Fìmmina muggheri  
e cumpagna di vita!

Fìmmina  
e matri di tutti niatri!

Fìmmina  
chi figghi amuri  
e duni sempri amuri!

## GÈNIU DI MALI

Pòvira terra  
assammarata di duluri,  
sàlici chiàncinu e asciùcanu  
làcrimi di chiantu.

Ci sunnu vuci di verra,  
nun si senti chiù  
lu cantu di la vita.

Gèniu di mali,  
la vita è na ricchizza,  
pi tia nenti vali,  
pi tia puru arriva lu tempu  
di sèntiri la ciusciatina  
di lu ventu.

T'agguanta lu scantu  
e cuminci a sèntiri  
li rizzi di friddu nta la peddi.

Ti 'ntunnìa  
l'orchestra senza musicanti  
e taliannu  
lu chiaruri di li stiddi,  
la to manu cerca aiutu,  
strinci 'n vacanti.

Tuttu succeri 'n fretta,  
accussì, comu avìa a èssiri!

## OMU FÀUSU

Nta stu munnu si' presentì,  
di stu passu vasti lu passatu:  
chi ni sarà di lu futuru?  
Omu armatu di putìri arraggiatu,  
lu ciriveddu l'hai difettu.

Omu senza firi, cu priputenza  
la to manu fa mattanza;  
nun hai cori 'n pettu!  
Omu fàusu appagnatu  
etti càuci di chiummu!

Criscisti 'n sarvaggiu,  
ti senti forti,  
nun rispetti li leggi di lu munnu,  
accùpi vita e arricogghi morti.

Omu, timpesta di odiu,  
viulenza feroci;  
omu, bannera senza culuri,  
taliati nta l'occhi  
quannu affaccia lu suli  
nta la chiarizza di li celi.

Nun c'è chiù musica nta lu to cori.  
La to vuci nun havi chiù risposta,  
la to vuca è amara feli.

## TERRA MARTURIATA

Nta st'èpuca  
nun c'è postu pi sta genti:  
figghioli chi di li matri  
vonnu èssiri pasciuti,  
hannu ancora lu latti nta la vucca,  
vonnu crìsciri 'n fretta,  
lagnusi di travagghiu,  
valenti di cuteddu  
e picciuli 'n sacchetta,  
fannu danni chiossai di li granni.

Hannu ràrichi di mala crianza,  
di droga, di pastigghi e di vinu abbivirati,  
strafuttenti fannu strameri,  
mètinu vita comu fussi nenti.

Jò nun voggghiu esagirari:  
sunnu germogghi di mali!  
Terra marturiata di morti ammazzati  
chi mancu si ponnu cuntari!

Lu mali pigghiau lu sopravventu,  
lu duluri resta stagnatu nta la menti,  
la vucca muta agghiutti paroli,  
manca lu ciatu pi putiri parlari.  
L'occhi stanchi senza làcrimi  
talianu àutri occhi...

## RE DI L'UNIVERSU

Santu,  
nta sta terra  
c'è bisognu d'aiutu:  
l'omu è canciatu,  
certuni pèrsinu la testa  
e li sentimenti,  
ci va di mezzu la genti onesta!

Dùnaci n'abbissata  
a sti cristiani  
chi abbannunaru la strata:  
mèttici un frenu!

Santu,  
leggi a vuci àuta  
lu libru di la vita,  
arrinfriscaci la menti,  
fatti sèntiri:  
l'omu persi lu sennu!

Nun c'è chiù religioni  
e mancu amuri,  
c'è viulenza nta sta terra!  
C'è bisognu di fratillanza,  
c'è bisognu di 'nnuccenza!

## CI VOLI FIRI

Picchì?  
Picchè lu Signuri  
ni desi lu donu di la vita?

Ômu,  
tu ci hai a crìriri  
pi megghiu campari!  
Ci voli firi:  
l'ànima avemu a cunfurtari!

Avemu  
addivintari vecchi  
pi putìri capìri  
picchè semu supra sta terra.

Dintra di niàtri  
avemu a scavari:  
ci sarà luci nta li nostri cori!



## UN TRENU PI TUTTI

Semu tutti supra stu trenu:  
li putenti di lu munnu,  
li ricchi, li granni menti  
e tanta pòvira genti.

Stu trenu firria sempri 'n tunnu,  
li porti sunnu sempri aperti,  
si senti l'innu cu li banneri  
mentri pàssanu li jurnati.

La spiranza ni teni 'n peri!  
Stu trenu porta sempri  
la stessa andatura,  
nun si ferma mai  
e mancu si sapi  
dunn'è chi ti cunnuci.

Gira, vota e firria  
nta un lampu di luci  
si scinni 'n corsa  
ma nun si sapi quannu tocca a tia.



## LUNTANU DI TIA

Pruvai a stàriti luntanu,  
lu cori forti mi battìa;  
la me testa era sempri a tia,  
mi mancavi, mi sintìa stranu.

Vacanti virìa tuttu 'n tunnu...  
Quantu sonna arruspigghiati  
e li pinseri ammunziddati  
mentri livàvanu lu sonnu.

Tu si' comun na calamita,  
di tia sugnu 'nnamuratu;  
vogghiu ascutari lu to ciatu  
vicinu a tia tutta la vita.

Oramai sugnuuntu granni,  
ma nta 'i to vrazza sugnu nicu  
comu fussi ancora un nutricu,  
eppuru haiu già sessant'anni!

T'accarizzzu cu li me manu,  
ti talu cu l'occhi lucenti,  
tu si' sempri nta la me menti,  
ora di tia nun staiu luntanu!

## 'U PATRI GRANNI

Comu lu ventu pàssanu l'anni,  
di cursa si ni jieru li vint'anni,  
mentri passa l'ura  
assumma la paura,  
li passi si fannu curti e lenti  
e li pinseri sunnu azzenti.  
Essennu fatti granni  
prijamu 'u Patri Granni.

E veni lu momentu di lu passaggiu  
mancannu a tutti lu curaggiu.  
Picchè...picchè s'astuta lentamenti  
sta vita e nun putemu fari nenti?  
Si sintemu comu lanni ammaccati,  
stanchi e 'ncuttumati;  
ora chi semu mali cumminati,  
chini di malanni,  
prijamu 'u Patri Granni.

E veni lu momentu  
di lu pisu e di lu censimentu,  
d'acchinari nta la balanza  
mentri li pinseri sirpianu nta la panza.  
La testa cumincia a furmiculiari:  
avemu tanti cosi di pinsari!  
La menti si 'mpiruggia  
e si sintemu nichì comu n'augghia.  
Li forzi cumincianu a mancare:  
'u Patri Granni avemu a prijari!